

四庫全書

集部

欽定四庫全書

集部

宋百家詩存卷二十三

詳校官監察御史_臣孫家賢

主事銜_臣徐以坤復勘

總校官庶吉士_臣倉聖脉

校對官中書_臣李奎

謄錄監生_臣孫炯

欽定四庫全書

宋百家詩存卷二十三

嘉善曹庭棟編

招山小集

劉仙倫一名儼字叔儼廬陵人詩名聞海內先後與
劉過並稱才甚豪不過以韋布終其身其詩新警峭
拔洗脫塵腐不為格律所拘著有招山小集淳熙間
岳周伯持浙東庾節待次過張仲隆家見儼題快目

樓詩讀而壯之後擬來謁仲隆仲隆置酒北湖招周
伯曰詩人在此亟踐勝約既至一見如舊交座中以
二詩遺周伯有云從今便是門闌客時出山來撥詔
除擬與周伯真所謂得一知己矣

中秋有懷

吾廬有寒梅老榦秋風多上有雙棲鳥月夜聽我歌一
別三載強梅影應婆娑烏今來不來奈此明月何

梅樹秋

誰將和羹姿植彼江之濱老葉纔脫柯生意覺已欣寒
流帶孤標澹月寄一痕莫作搖落看下有春風根

水楓歎

楓葉不耐冷露下燕支紅無復戀本枝策策隨驚風鄉
來樹頭蟬去盡不見蹤日落秋水寒哀哀叫征鴻

得蟹無酒

水鄉秋晚得白蟹望斷碧雲無酒家此意淒涼何所似
淵明醒眼對黃花

盱江道中

過雨青山啼杜鵑池塘水滿柳飛綿
田家正是忙時節
女采桑歸男下田

有懷二小姪

殊鄉憶諸孫觸緒成歎嗟阿獐蚤失父
煢煢垂兩髻已
知陟岵悲啼哭聲啞啞阿獐幼豐下
出入常隨爺別時
俱學書落紙翻老鴉倒指今三年為學
當日佳應解對
我兄言叔不還家何時重抱持課書
賞梨楂看渠俱成

人憐我雙鬢華侍我兄弟醉會當相扶又

贈曾相士

大曾兩眼如磨銅坐上一顧凡馬空發天機緘被天惡
老死不遇悲途窮小曾短小眼如鵲冷地看人看入骨
誰云輪扁不傳心獅子還生獅子窟倒拖拄杖行九州
平生慣識公與侯得錢送家養老母裘袂慘澹行囊羞
我慵百事不入耳休說功名老無味他年相伴竹溪頭
同采芙蓉渡秋水

秋夜長曲

秋夜長秋月明愁人不成眠搔首行中庭天高氣肅萬
籟息銀牀凍損寒露零碧梧已蕭條棲鳥終夜驚枯荷
倒秋水夜氣凍流螢銅壺悲咽漏下澀深閨何處鳴寒
砧亦有朱門人環坐圍娉婷玉觴催喚酒銀甲紛彈箏
衣篝龍腦熏繡被珊瑚枕煖愁難聲秋夜長秋月明此
時幾人知此情

西林留題

路入康廬西復西，翠煙深處著招提。
山僧幾輩雪垂頂，水鳥數聲雲滿溪。
莫對青山譚世事，且循粉壁看留題。
禪房夜臥衣裳冷，夢破鐘聲落月低。

海上

潮撼三山島，煙橫萬里沙。
蜃樓春作市，鼙鼓暮催衙。
一曲水仙操，片帆漁父家。
安期定何處，試問衆如瓜。

送徐淵子知縣

城郭春寒夜，郵亭小泊時。
相逢一尊酒，共說十年詩。
風

雨成輕別江山莽後期著鞭從此去蚤到鳳凰池

秋郊

秋水四五尺暮山三兩峯浮雲白毫相落日紫金容
蓑笠前邨笛樓臺古寺鐘殷勤小平遠圖畫憶渠儂

代人憶舊

緩步素絲幃微吟紫綺裘醉便風側帽歌愛月明樓
犀軸題春恨銅壺滴夜愁風流十年夢燈火漫揚州

題雪浦人歸圖

亂目寶花雨過眉斑竹筇挈音迎畫鷁喜態動烏龍水
鏡千江月風琴萬壑松遙知水今夕情話得從容

彥美生朝

壯日里間俠臂彎雙角弓繡韉紅匝貂袖紫蒙茸雲
態自蒼狗玉輝猶白虹若為占壽骨綽起有清風

車轆轤

馬虺隤牛轂棘山行縈紆車轆轤路傍指點是官人老
矣一翁雙鬢白汝牛幸可耕汝馬幸可騎有此可載琴

書歸胡為奔走東西道白髮刁騷被人笑

沙漫漫

沙漫漫草斑斑南北山山相對看我行乃在山之閒行
人仰不見飛鳥樹木定知邊塞少沙漫漫草斑斑我行
欲趁西風還僕夫汝莫愁衣單我但著衣思汝寒

寄題安品起官舍北溟

一軒高占鳳麟洲要作人閒汗漫遊海閣風煙自朝暮
洞天日月幾春秋夢魘欲拂三花樹生計聊隨一葉舟

待我丹成訪君去閬風佳處卜菟裘

谿莊

疇昔何來此青山與白鷗絮飛春不去潮逐月頻留

以騎驢鍾馗送秦先之

髯鍾矍鑠老據鞍曾入大內見阿瞞幙頭垂脚藍綬敝
不知班簿為何官天寒歲晚日云暮霜風吹驢耳卓豎
老臧負笠衣裳單反袂掩口趾穿屨華門我恐難留君
收卷送似秦將軍將軍文事有武備眉骨自是凌煙人

汝當訶護謹厥職勿但縮頭徒挂壁將軍來歲在殿巖
豐汝牲醪作除夕

野步十首

南鴈數聲嘹唳西風雙鬢鬢參病葉夕陽滿樹斷雲殘
雨歸崑

滿灑枯藤老履行行只復行行泥路野人屐跡石橋流
水琴聲

黃犢眼中荒草鷺鷥立處枯荷宦海風濤舟楫故山煙

雨松蘿

愁思冥鴻杳杳吟情敗葉紛紛歸去滿身溪雨醉眠半
枕山雲

白日長繩難繫青帘濁酒堪賒歸鶴蒼山雲際故人錦
字天涯

紅葉林風颯颯蒼苔徑雨斑斑人跡石邊流水樵歌鳥
外青山

流水數株殘柳西風兩岸蘆花荒草客愁遠道夕陽牛

帶歸鴉

按步緩尋幽草楊眉一望平林鳥影漁磯日暮豆花邨
屋秋深

幾處漁樵石路數家雞犬柴門竈屋殘煙杳靄溪流澹
月黃昏

木葉西風古道稻花北隴新田流水美人何處夕陽荒
草連天

題張仲隆快目樓壁

上得張公百尺樓，眼高四海氣橫秋。
只愁笑語驚閭闔，不怕闌干到斗牛。
遠水拍天迷釣艇，西風萬里襲貂裘。
眼中不著淮山礙，望到中原天際頭。

自哂

曾騎白鶴上揚州，頭插花枝秉燭遊。
尊酒邇來誰是伴，白雲收盡數峯秋。

鬪雞走馬醉高陽，今日歸來兩鬢霜。
無限少年心上事，半簾豆雨語寒蟬。

古樹閑雲獨抱琴
琴聲寂靜樹雲深
相如渴死文君老
辜負題橋萬里心

世事悠悠酒幾杯
晴窗把鏡獨徘徊
西風吹老梧桐樹
仍送新霜兩鬢來

寬博麻衣折角巾
疎慵不是少年身
白雲半枕山中午
猶夢乘查去問津

歸鳥

紫山青嶂盡如家
負日衝煙復帶霞
今古乾坤秋一幅

幾番歸鳥與棲鴉

四皓

長樂卮前露雪眉
品花亂笑出山時
有人拍手瓜田裏
來往青門總不知

鼓瑟二首

滿樓明月調雲和
五十絃中急雨過
彩鳳拂衣鳴翠竹
素鱗鼓鬣出寒波
淒涼楚客新愁斷
清切湘靈舊怨多
一曲更沈人已靜
江頭雲挂綠嵯峨

朱絃聲奏徹雲清有客沈吟倚桂聽遺響一時存楚曲
斷霓千載寫湘靈珠隨明月生滄海船挾風波過洞庭
縹緲無言膠柱倒遙遙江上數峯青

贈周伯二首

昔年推鼓事邊庭公相身為國重輕四海幾人思武穆
百年今日見儀刑筆頭風月三千字齒頰冰霜十萬兵
天亦知人有遺憾定應分付與中興

已買湖山卜奠居因君又復到康廬十年到處看詩卷

一日湖邊從使車南渡忠良知有種中原消息定關渠
從今便是門闌客時出山來撥詔除

題歸去來圖

筆端奇處發天藏事遠懷人涕泗滂餘子風流追魏晉
上人譚笑自羲皇折要五斗幾錢值去國十年三徑荒
安得一堂重寫照為公攜酒瀉蕉黃

盱江道中

屈曲清溪繞徑斜綠陰深處隱人家嵐昏山色未還觀

水落漲痕猶在沙麥熟邛邛喧水碓蠶成處處響繰車
馬頭忽覺清香近路轉橋南有野花

寄題孔德通東園

花木陰陰一畝宮平生高興與誰同尊壘北海無虛日
鄉里東家有故風先業固知衣鉢在穴門應惜橐奩空
襄陽耆舊今誰識尚喜風流見阿戎

臨川報恩寺與涂子載陳惟定分韻得丹字

杏花枝上雨初乾梵宇苔深碧瓦寒三客燈前共湖海

五言詩裏定金蘭殘年短髮因愁白多病衰顏借酒丹
後夜相思月千里不堪獨自倚闌干

寄朱濟仲

家在三千里人來天盡頭角聲連夜月草色帶邊秋妻
子仍多病音書缺寄郵歸心與寒鴈先已過瓜洲

盱江驛舍中有婦人書一憶字筆勢頗姿媚游
子明王相之皆題其後率余同賦

陽臺雨歇行雲杳天闊鴻稀春悄悄鷓鴣孤眠怨芳草

夜夜相思何日了
妾非無聲不敢啼
妾非無淚不敢垂
柔情欺損青黛眉
夢魂暗逐蝴蝶飛
春風著人瑣窗綠
綠窗書事記心曲
細看香翰宛且柔
中有閑愁三萬斛
向隅棄筆惆悵時
此情默默誰得知
無緣相見空相憶
不如當日休相識

題惠崇鷺鷥

清霜著木高柳枯
驚風獵獵吹寒蘆
蘆根敗蓼色慘澹
沙觜無復菰與蒲
風標皎皎四公子
來從西雝有閑思

肝腸澡濯秋水清雪衣不受泥土滓偶得一飽即自如
鵬飛萬里何闕渠出離風波岸上立豈只臨淵常羨魚
惠也小景稱獨步那知寫生尤得趣傍邊謹勿生機心
恐即長鳴過溪去

過嘉興

惆悵嘉興路三年幾度經航船連夜發更鼓隔城聽落
月低煙樹秋風冷露螢客懷容易感宜醉不宜醒

魏塘道中

霜葉紅於染寒溪湛若澄幾聲歸鴈急數點暮山青深
淺頻斟酒長塗小作程萬緣天已定得喪一毫輕

送陳惟定惟定有伏闕上書之意因以箴之

傾蓋相逢二紀前六回相見兩華巔詩成神鬼皆遭役
命薄文章不值錢北事如斯君可去西齋重到我淒然
他年卜築如相覓更約西山暮雨還

仲立於枕上和余韻夜半得句敲門喚余余乃
攝衣而起相與對語於野航橋上因再用韻

夜半詩壇喜解圍
楚天雲澹玉繩低
撞鐘自得興不淺
泣鬼初成人未知
踏月過橋驚鶴睡
犯霜對語伴烏啼
蕭條此意欣重見
絕勝圍紅醉玉卮

登岳陽樓

八月書空鴈字聯
岳陽樓上俯晴川
水聲軒帝釣天樂
山色玉皇香案煙
大舶駕風來島外
孤雲銜日落吟邊
東南無此登臨地
遣我飄飄意欲仙

皇芻曲

鄧林字楚材一字性之自號四清社友福清人年十五即以詩義魁鄉校淳熙中登進士一時名公卿如周益公陳止齋晦翁朱子呂東萊俱引為交游嘗伏闕三上書陳時事得失朝議欲授以中都幹官或曰鄧林若在中都此謫議之府也遂授石城丞其詩有皇芻曲一卷共詩五十篇淳祐時大山蕭山則序云詩世業乃精有羹叔即有性之羹叔詩工如柳煙鶯曉障杏露蝶春糧如桃葉渡江狂子敬梨花帶雨澹

真妃皆奇性之益出此性之姦叔子也

南國有佳人

南國有佳人仙姿自蓬島
龍綃照明璫鳳釵橫貴寶
新妝試鸞鏡皎皎顏色好
芳年倏已并君子可偕老
奈何行媒弱修言棄中道
洞房閨悵悵玕璫結組縞
寧作鍾離春勿學姑瑤草

劉阮

鹿車小宇宙據鞍常醉眠
風塵瀕洞時杯裏全其天
伶

達故自佳籍放乃無用試看勸進表何似酒德頌

綠珠詞

涼臺瀟灑臨清波幄翠簾珠明綺羅哀絲號竹按清歌
紅潮素臉春風和主君歡娛美人醉報有無情使車至
幾叢蘭麝俱委塵獨指綠珠可當意衆中偏是承恩深
妾身雖賤無二心君前拚命效一死玉笛收聲紅日沈
輕裾飄向闌干角花鈿散地金釵落到頭不負齊奴約
猶勝識字空投閣

玉兒

金蓮花上俞尼子永壽神仙羅繡綺苑中荊荻市令嚴
玉像支離瓦官寺六宮鴨劇起淫風太白便應懸妲己
此身肯許兜鍪夫猛為東昏拚一死到今羞殺賣降人
去作練兒梁姓臣

孤山訪鄭渭濱不值

寂寞石琴臺香雲撥不開多知騎鶴出自欲買舟來葑
岸春回草山亭雨謝梅懷人成悵惘日暮惜空回

書懷

西林吹羽扇吾道竟淒涼上坂勞騏驎低巢窘鳳凰可
求非富貴無用是文章冉冉深林底幽蘭正自香

真陽峽

滿眼皆吟料歸囊未盡空江波連岸碧野火漲天紅高
樹留寒日長蘆轉晚風客程雖小艇心已故山中

凌江灘

灘高舟去緩閑眺暮江濱竹本沙痕舊茅叢燒色新青

裙瓶汲澗白帽斧尋新渺渺蠻煙起秋風一旅人

近況

近況只如此深山無見聞
二申猶學道三上漫攻文
芸葉春繡日梨花曉夢雲
添香仍煮茗嚴敬事天君

蚤過劉功父清溪

月裏山河大風前草木涼
征塵生杖履香霧溼衣裳
古嶺攀棲鶻荒蹊蹴聚蝗
白雲看未遠已轉九回腸

曲江歸舟

只道逢低礙覓詩眼前物色自多奇
千山赭去如秦樣一水清來似晉時
漁父豈無緣葦輩樵人恐有負苓師
僮奴忽報梅花動春在江頭最北枝

感興

竹帛功名九折車棲遲巖野竟何如
浣花溪上尋佳句積穀山頭讀異書
江左風流空醞藉淮南煙景尚彫疎
太平十二河汾策擬欲排雲謁帝居

蛟峯先瑩

獐狻蟠伏鬣封孤雲黯幽亭日向晡雙桂千年翔化鶴
四山半夜泣於菟老天忍挫真英物厚地甘埋大丈夫
無計發潛空涕落雨松霜柏照煙蕪

賦江郊漁弋

占斷江山是一家寄情漁弋當生涯青楓翠竹春屏葉
白藕紅菱曉鏡花鴻鵠鵬鵬鶚鵲鰭鱗鯉鯢鱗鯢
河陽書到君當起弩發千鈞釣五車

豫章

郡名猶是漢流傳
宇宙江山復幾年
畫閣倚空家十萬
紅妝鬪夜妓三千
層城歌舞秋風外
故國興亡夕照邊
近歲重陽成重鎮
鎮南烏幕鎖蒼煙

章貢祥符吳道士嬾窩

蚤年收得自由身
坐斷窩中嬾是真
日短日長惟守靜
雲來雲去不生瞋
破除機械鷗盟熟
脫略鉛銖鶴料貧
舊看黃庭猶忘却
應無心力對閑人

江湖偉觀

世間無盡是天遊更出湖山最上頭江面春聲潮卷雪
湖心寒影月澄秋海門舟楫雲開見瀛嶼亭臺水載浮
不比錢塘歌舞處遠懷西北有神州

送徐權院奉戶檄之九江諸郡

中邊瑩徹似冰壺空盡時情意氣殊已向銅龍梯要路
又隨玉馱駕征涂風生湓浦江流急雲滿匡廬夜月孤
竭到東南無力了一分寬處是規模

晉武帝

秋風銅雀曲池平吳主宮娃滿掖庭憑仗皇孫聰慧蚤
不知禍在夕陽亭

左太沖

辛勤十稔賦三都聞者曾貽酒瓮書他日洛中添紙價
陸家兄弟竟何如

朱彥和

文如玉海動時流曾以書綦伏隱侯武德閣前消幾語
却令梁氏缺金甌

任蠻奴

千里旌旗已渡江
蠻奴苦諫喚蕭郎
却持官裏黃金去
望拜韓擒石子岡

敬微

受用廬山水石奇
亭亭霞外辟蘿衣
侍中那抵蘇門幃
笑死丹青陸探微

鄧郁

雲母餽糧五嶽樓
繡娃少嫗導仙遊
不應輕信雙青鳥

便遣東都事業休

石崇

梓澤神仙第一居，爭豪不惜碎珊瑚。
荆州使客知何罪，未必亡身為綠珠。

張茂先

辨精龍目亦奇才，雄匣干將耿不回。
只守鷓鴣宴蚊睫，賦大星未必折中台。

送衡山琴畫張道士

滿天風月澹蕭寥三尺孤桐古調高不敢問君聽別操
請彈二十五離騷

滿空煙雨澹模糊三尺霜鰥老墨枯不敢問君求別景
請描七十二峯圖

桂樹

翦翦霜風起晚吹一溪流水浸寒暉客衫猶恨吳綿薄
不道邊人盡鐵衣

過綠野

世上今無隱退風地名偶與午橋同往來怕看銅駝陌
閑倚柴門憶晉公

西湖

高價租船作勝遊窮逋那敢鬪風流西湖多少閑春水
不洗中原二百州

順適堂吟藁

葉茵字景文笠澤人與徐璣林洪相倡和江湖閒詩
人也不慕榮利蕭閑自放所居草堂三楹榜曰順適

取少陵洗狀順所適之句賦詩云順時不作榮枯想
適意元無勝負心又云兒童問我新官職順適堂中
老住持蓋脩狀有遺世之想焉吟藁五卷閑雅似仲
先清矯似和靖豈其志趣相契故口吻亦合邪

古意

悠悠淵邊人濺濺淵中水水流無返時人生流水耳

偶成

春陰晴復陰因物悟浮生杜宇鄉心重揚花世事輕知

非遂伯玉覺是晉淵明此意誰人會騎牛訪耦耕

蘇隄

南北山圍翡翠隄邊綠漲軟琉璃參差臺榭無餘地
雜遝輪蹄了四時楊柳又多前日樹梅花祇少近人詩
停篙不看春風面閑伴漁翁理釣絲

野望

白水沿隄護綠苗雞鳴犬臥柳邊橋數家雖不成邨落
一夢何曾到市朝

次潘紫巖虎邱韻

潭深劍氣鉉樹瘳嵐光薄石壇古即今藤花開又落晉
士已結廬吳市猶舞鶴沈吟發幽懷人世舟藏壑

野堂

風來無市聲景物占淡淨鷗狎堂上翁時來點天鏡

江湖偉觀

此地舊寒碧留題護竹君窗虛不礙月壁老易生雲一
水東西隔兩山南北分未堪低著眼世事正紛紛

何氏書堂

晉何楷讀書之地因名何山

千歲松陰護一亭風來猶帶讀書聲縱無芳史書勲業
自有青山說姓名客撫豐碑苔剝落春歸暗徑草生成
幾年訪古謀清隱好借虛檐著短檠

寄所思

浙浙竹下風活活橋畔水蕭蕭掩柴荆去去隱君子夙
夜勞我思之德洵且美瞻彼南山阿有桂發叢蕊奮手
折其榮懷袖香盈只願為靈鵲飛遞聲入君耳

春去

幾陣紅侵野草一團綠染庭槐夢裏未知春去翩翩蝴蝶飛來

歸途

春來天氣半陰晴那更奔馳一月程又恐花時成草草還家插柳佐清明

山行

青山不識我姓字我亦不識青山名飛來白鳥似相識

對我對山三兩聲

次出郊韻

支藤乘輿入春郊
梅壓疎籬亞竹梢
賸喜此行詩有料
吟來渾不費推敲

生日口占

舉室相先起五更
為翁誕日壽金觥
癡兒未識翁年甲

五十年前今夜生

時五十一

酒邊次趙東閣韻

竹褪粉痕新銷磨九十春中年真率性上古太平人有
夢詩將聖無愁酒不神靜看紅紫路翻覆幾回塵

友人自淮至

別子若為久於心終不忘一杯評舊雨兩鬢對新霜客
裏春行蚤愁邊夜坐長明時成擯棄無語及淮鄉

雪城

愛向其中矚短篷眼前景物總玲瓏神仙窟宅垂楊裏
圖畫溪山落照中甚是繁華輸俠少也須幽勝屬衰翁

世間風月無如此買鶴來謀地一弓

雨中梅

玲竈竹外枝啼妝凌曉霰東君不主盟對人作此面

即事

竹暗筍無數江晴水有痕田蛙喧麥隴野犬臥柴門

過溪

筍輿軋軋亂山中籬落桃花潑眼紅小駐渡頭呼艇子

一溪淺綠漾晴風

白髮

半世持竿笠澤濱
鬢邊留得幾莖春
近來白髮無公道
暗把黑頭饒貴人

泊舟溪口

萬柳陰中繫客船
柔條如竹葉如錢
大姑小婦挑甘薺
搖手烏兒正二眠

除夜立春

別歲傳佳話
論文憶舊盟
黃柑凝臘釀
爆竹帶春聲
節

序有終始兒童爭送迎此身強健在列炬到天明

梅

疎影幾黃昏明明野水濱未風先信息無雪更精神一
白見真色萬紅隨後塵自來花下飲肺腑盡生春

遊西洞庭山

漫遊三十載屐齒暈蒼苔兩地無多里一生能幾回洞
深龍未蟄丹熟竈無灰已覺忘身世松梢有鶴來

山行

未了行春債因哦遣興詩寒多啼鳥噤路滑蹇驢遲久
雨紅辭樹深林綠授枝驚心衰朽日容易過花時

入山

到來非俗境一片隱心生曉霧沈山色春禽和水聲逢
人多古貌對語率真情同在無懷世爐香答聖明

秋至

節序暗推移清商漸戒期旅懷蚤蚤計涼信柳先知萬
事到雙鬢餘生消幾詩最憐梁上燕巢穩又歸時

苦雨

農事正紛紛天時異所聞舉頭方見日翻手又為雲茅
舍蛙分部槐庭蟻失羣裁成憂國疏齋沐告吾君

欲別

欲別哽無語蘸酒評歸期潮汐有朝暮郎心無轉移

擢雪

舟名

放船中流天模糊浙浙霎霎鳴菱蘆萬頃剎那成玉壺
柔舫蕩漾歌吳歆老漁直前相招呼骨相子猷洵且都

其人豈是斯人徒相顧而笑掀虬鬚汝為汝兮吾非吾
剡溪風景今何如誰能為人作畫圖予方奮臂持竿獨
釣於江湖

田父吟

去年積潦苦無收今歲逢人說有秋未擬香粳供一飽
穆穆新藁蓋檐頭

逢逢社鼓佐豐年酒熟那逢釀雪天擘橘煮雞償一醉
布衾烘暖抱孫眠

雜興

兀兀北窗下嘈嘈林閒鳴聲各奏小大諒亦隨其形條
狀氣肅冽一夕俱沈冥試語塵中士細聽秋蟲聲

七十云古希予年三之二來景殊無多那復就枯瘁窘
步驚畏途撫心慨時事何以怡餘生一日委一醉

鱸鄉道院

田可耕兮圃可疏幾年夢不到亭衢山林受用琴書鶴
天地交遊風月吾事變無涯人老矣死生有命汝知乎

客來時復一杯酒
畫作鱸鄉醉隱圖

送徐兄訪陳宰

投老持竿柳外邨
尺書久不抵修門
料應下榻從容日
自說通家好子孫

山行

舍櫂入山邨
山深樹自繁
短歌田舍樂
長揖野人尊
苔老雲生石
松高月闕門
不聞名利語
太古一乾坤

瀟湘八景圖

平沙鴈落

江風飄雲白如練，征翰遠赴蘆花岸。
寒霧昏昏漁火明，欲飛不飛行陣亂。
相從萬里多崎嶇，呼鳴驚察夜有奴。
衡陽路杳速歸去，未可容易來江湖。

遠浦帆歸

水天冥冥日催暮，輕蒲飽風疾飛羽。
回頭遙指舟前灣，浪急篷敝下柔艣。
楊枯桑深處邨，老妻挾兒環在門。
蓴羹香滑茅柴熟，對語別時應斷魂。

山市晴嵐

巖麓新霽浮紫煙幾家雞犬喧一鄮憧憧人得蠅頭利
不了青帘酤酒錢松陰散亂日易暝風光漸入牛羊徑
頰肩赤脚分途歸野唱樵歌動幽聽

江天暮雪

凝雲貼水天四垂寒鴉凍雀無樹棲紛紛萬頃水花亂
光眩銀海迷東西中有輕舸移斷浦玉笠瓊蓑一漁父
鼓枻而歌歌豐年田家有麥無愁苦

洞庭秋月

長波淼淼七百里蒹葭颯颯西風起
玉輪輾出琉璃宮
碧落空明無表裏幾峯森列青崔嵬
不知人世皆塵埃
夜深絲竹遞清響疑是楚王曾歸來

瀟湘夜雨

雲氣浮江天已夕江樹號風飛雨迫
淒涼正則賦懷沙
疑與漁翁分半席一聲暖迺隔中流
打蓬淅霏添旅愁
土膏動脈曉色媚農將有事於西疇

劉言史瀟湘詩開
歌暖迺深峽裏

煙寺晚鐘

冥濛一抹籠崢嶸
崢嶸深處傳疎聲
溪橫古槎低欲折
隱約前邨通去程
萬里征夫不知宿
數盡飛鴉棲古木
輪輿中邊三四僧
枯藤桃雲歸佛屋

漁邨夕照

家家傍水開柴扉
綠楊影裏沈斜暉
妻炊黃梁子挂網
獨枕莓苔眠釣磯
得魚博錢平生志
世閒寵辱不能累
路近桃源多喬孫
定知秦晉興亡事

古意

境空納風月心遠辭埃塵終日窮目力得景亡天真

次韻

生涯老布衾清處更清吟舊事即新夢今人非古心意
行雙謝屐道在一陶琴誰解無名利其中有淺深

幼弟墓下

庵扁看雲
用少陵句

春到棣無色風來松亦悲細看雲起處不復鴈歸時憶
汝九京隔嗟予兩鬢衰寥寥今古意獨許杜陵知

室人墓下

楚愴埋香地，卿須念藁砧。
齊眉中道訣，同穴百年心。
刀尺凝餘澤，松梧帶老陰。
可能如鮐婦，相對白頭吟。

張翰

膾鱸元不動，鄉思拂袖西風已見幾。
江上如今來往客，但言鱸膾不言歸。

次韻

嬾作千年調，偷閑得幾回。
吟壇元不峻，俗駕可曾來。
蘇

碧牆陰合榴紅屋角開枕肱真樂在飲水當傳杯

夜坐偶成

尊鱸江上鄉穩處著虛堂却埽百念息貪吟萬景忙螢
流風戶牖蛙鬧雨池塘夢熟田家事牛衣趁時秋

笑靨花

簇簇瓊瑤屑花神點綴工似知吟興動滿面是春風

琴堂

片石鄰空掌樣平吳兒曾此御瑤琴琴中腔調誰人識

獨有顰妃是賞音

洗妝池

離宮脂粉尚淳香人去僧來歲月長
鐘磬咒成功德水塵根洗盡水清涼

春晚

春色漸昏昏那逢日帶曛
落色紅一尺新筍綠三分憶
友盟留石尋詩思入雲風光到田舍
瘦策看耕耘

自遣

偶對格

蟻夢功名覺即休
駒陰歲月去難留
傷今不復并三樂
擬古猶堪續四愁
松下挹琴塵外境
雨餘蒔藥柳邊洲
老來莫問浮生事
醉後同為造物遊

憶弟

支藤來海嶠
骨肉海西邊
對月成千里
舉頭同一天
更沈寒戍角
歌急晚潮船
孤鴈傷予意
聲聲落枕前

相逢

相逢疑舊識
敲火自煎茶
盛欲為留計
其如未是家
東

西分地脈南北兩天涯別後思君處空齋識燭花

山居

古木環池竹數竿疎籬補菊屋三閒白雲不放紅塵入
無怪山人嬾出山

省墓

隴上松杉手自移至今苔蘚半寒枝夢中不記重泉隔
猶學兒童戲綵時

梅

霜月相摩漏二更書窗伴我一枝橫自矜前輩持清白
妬紫妖紅總後生

信步

九十日春未老兩三番醉如泥行遍菜畦麥隴未饒十
里蘇隄

春晚

閉戶蠶新浴開簾燕蚤歸何曾春欲去自是物華非
蝴蝶夢中意杜鵑聲外愁問春春不語柳絮絮暗汀洲

偶成

留得春風趁馬蹄
日長無事綠楊隄
菜花籬落誰家酒
緩轡長歌過小溪

西湖

緗桃深處五陵家
隄柳陰中百寶車
多是問桃尋柳去
近來山下少梅花

憶友

瀟瀟檐角雨
冉冉雨中舟
年老難於別
春寒重却愁
風

窗亂書葉塵壁暗燈篝夜半無來鴈披衣對小樓

次韻

疎窗小博山窗外鳥闌闌占得江湖隱佐成天地閑檐
牙叢篠碧牆隙兩鳩斑癡坐不知晚漁篷卷釣還

次賦順適堂韻

萬卷藏書抵萬金脩然軒宇絕塵侵順時不作榮枯想
適意元無勝負心蒲石疎簾真道院栢香淨几小叢林
四時勝有閑風月醒裏尋題醉裏吟

有所思

仰天有所思心遠自苦短西風驅殘雲千里月華滿

山居

朝踏山根雲暮歸雲中扉野鳥始驚避今焉情依依異
哉海上鷗猜疑未忘機

己酉生日敬次靖節先生擬挽歌辭三首

放浪宇宙閒世事策局促駸駸影中人不受時采錄奄
朕長夜歸齋志空山木昔日堂上歡今夕堂下哭哭之

欲其生予亦不自覺天道元無私紛紛徒寵辱素心惟
坡仙一死萬事足

自古皆有死載歌酬清觴嗟予蚤失怙艱阻亦備嘗母
兮歲六十終古青松傍陟岡慟伯氏忘簪悲孟光後波
逐前波同歸漠漠鄉飄風相飛旒輦鐸聲央央

重雲翳蒼柏零露棲白蕭骨月慕音容恍惚哀空郊肴
核班幾席椒漿澆岩堯人歸天已沫音昧紙錢懸枯條逝

者如此耳暮暮仍朝朝暮暮仍朝朝人兮奈若何未死

不能樂既死空有家僮僕恩怨交朋舊幾悲歌若人會
斯語屬和紛陽阿

庚戌生日再擬去歲挽歌辭

憶昨歲莫止慨慷生死機擬韻追先哲持為自壽詩成
篇示叔季心狀口交非詎知不一霜季兮先露晞興思
發永歎載言涕泗頤萬化同於盡彭鑑空龐眉日月不
我與去去氣力衰且進尊中醪勿作兒女悲殷勤晉鼎
心趨前舞萊衣

酒邊次徐靈淵韻

柳外綠陰重綠陰生遠風溫涼三月候醒醉百年中桑
禿吳蠶熟林幽蜀鳥空不祈朝夕夢高臥太湖東

南塘偶成

靜向南塘驗物情東風又綠柳邊汀梅花密點殘棋局
蝸篆斜題小硯屏浮世虛無春後雪故人零落曉來星
逢時且進杯中醪休學懷沙賦獨醒

旅邸

湫隘囂塵不可居卜諸清曠亦遽廬雖無傷水梅依竹
喜有對樓人讀書止雀一枝聊爾耳戰蝸兩角竟何如
西風漸勁未歸去空說張翰憶膾魚

張翰字季鷹
翰作去聲非

記顏

五十一年前素昧相逢元是鏡中人他時鶴髮雞皮樣
却道今番畫未真

身後寄顏

生前喜作死規模強把冠裳束幻軀兒輩對人拋好語

吾家南極老人圖

次韻

燕入虛檐教子飛
風簾不卷和新詩
綠陰滿徑蜻蛉小
正是梅黃欲雨時

春事

春事又如此
猶人欲老時
綠稠煙外樹
白緊鬢邊絲
天道有還日
吾年無返期
從今安適境
莫放酒杯遲

晚春

遊事一番了愁多鏤畫長因思來歲賞未必少年狂野
鳥學蠻語岸花浮楚香魚應知我者圍圍到池塘

贈陳芸居

氣貌老成聞見熟江湖指作定南針得書愛與世人讀
選句長教野客吟富貴天街分耳目清閑地位當山林
料君閑遍興亡事對坐蕭然一片心

漁邨

古柳溪頭枕斷槎橫篙挂網幾漁家得魚去換紅蒸米

呼子來挑薺菜花

蠶婦歎

浴蠶纔罷餵蠶忙朝暮蓬頭去采桑辛苦得絲了租稅
終年祇著布衣裳

機女歎

機聲伊軋到天明萬縷千絲織得成售與綺羅人不顧
看紗嫌重絹嫌輕

廢墓有感

軒冕委塵埃今人為古哀百年邱隴廢幾箇子孫來蔓
草棲朝露窮猿泣夜臺世間類如此當樂且銜杯

掃榻

掃榻臥終日香銷百念除不愁渾厭酒無事勝鈔書粉
淺庭前筍青齊雨後蔬自嫌猶有累添水種金魚

風雨

昨夜東風急疎窗薦雨入溪南梅正花狼藉隨塵沙皓
皓多易汙不得全春華春華能有幾紛紛入桃李時哉

小興衰人生猶物理明發檐沈聲鳥雀喧新晴老農脫
襪襖一犁原上耕

投所知

中流砥柱一宗臣長把丹衷動玉宸三十四番如此疏
百年載後更無人堂留薇藥誰知己路長蕭茅謾得春
自是不曾輕出處到頭著著為斯民

虎丘

名海湧山寺乃
晉王珣珉宅

心境空時喜地偏杖藜來勘點頭禪重門鎖住海心石

一劔截開水底天誰記珣珉曾院宇尚傳吳越共山川
蘭風賸月知人意塔影松聲落坐邊

邨居

數舍茅茨簇水涯
傍檐一樹蚤梅花
年豐便覺邨居好
竹裏新添賣酒家

夜坐

秋院稗涼生看書睡未能
扇閑螢撲袂壁破鼠窺燈
晚境物華異清宵道氣增
鄰家猶不寐席地話豐登

偶成

醉敲牛角過前邨
此地應無利祿昏
有水可漁田可稼
即松而徑竹而門
賓朋連屬琴書樂
亭榭參差鳥雀喧
不假山靈回俗駕
會心同是一乾坤

偶成

人間總利名
此地此心清
雨架筆多潤
風櫺琴自聲
虛堂回古味
逆境見真情
脫帽尋蘄簟
酣眠小太平

浮世

浮世即浮家書車與釣車夢中行熟境塵外立生涯籬
落千絲柳池塘兩部蛙兒曹問農事擺耜隔田花

出城

清曉出江城波平覺櫂輕煙荷學人老風柳作秋聲歲
稔時無事心和物有情客來慵與語苦苦問功名

小垂虹橋

馮夷掣開潛蛟鑱御雲飛過松江左懸腰展鬣眠東湖
生綃描作垂虹圖隱君騎背占空闊百尺闌干景軒豁

有亭翼狀芙蓉開風朝月夕尤佳哉柳邊何曾官船來
回視驛橋多塵埃

舫齋

居家巧作浮家樣此即人生不繫舟政恐風波起平地
直教砥柱屹中流浪花影動重簾月潮汎聲喧萬葉秋
夢裏不知容膝計翻身栩栩逐輕鷗

新春

老來分外喜新春春事關心世事輕綦冒輸時方是著

路疑險處不須行
雨催農業鳩夫婦
風帶邊聲鴈弟兄
辦得斗園鄰屋角
賸栽芝朮了餘生

嚴子陵

怕被劉郎認故人
披裘釣澤隱餘生
無端伸足龍牀上
多却嚴陵一姓名

陶淵明

喚得歸來是督郵
東籬千古占風流
白衣未至秋蕭索
曾記公田種秫不

次韻

舉世一枰碁誰能著著奇嬾真安樂法醉即太平時梅
雨飛不斷茶煙凝欲垂吟詩為無事多事又因詩

二十里雲亭

杖錫山

蔽空青不斷杉徑影中行僧指夜無月客嫌春少晴臥
龍安舊窟倦翼亂歸程吟到長虹背人閒天上驚

田父吟

羣來野雀遶林梢三五人家住水坳翁媪語人年歲好

屋山添得一層茅

僧舍小泊

屏息小胡牀心魔已受降
香留煙出戶雲過雨來窗
自許參禪觀誰能折慢幢
山童求說偈竹影落寒江

雪

嘲王竹齋

春意滿庭除紅塵半點無
山川同變化天地一模糊
石友聳冰骨松公掀壽鬚
相望王子宅不見夜蓬孤

梅

溪橋一樹玉精神
香色中間集大成
疎影逼真前處士
羣花推重老先生
春回隴首人千里
月到窗前夢五更
甚欲折來還不忍
歲寒留取看崢嶸

次韻

古貌如君更古心
艤舟來伴故人吟
十分酒醉憂時切
一點燈昏語夜深
半似畫圖經兩壁
不成宮徵亂風琴
箇中好辦栽梅計
勝友從教載月尋

次吳菊潭八月十四夜韻

來夕九秋半月同心迹清已知千里共祇欠一分明流
水往來影幽人今古情撞鐘先得句塵世不須驚

旅況

未慣秋情緒客中方覺難酒慳疏舊識衣薄怯新寒雨
過浮雲溼風來病葉乾倚樓搔短鬢一鴈掠闌干

北窗

僧舍

八面玲瓏靜向陰靜中時現定中身解傳佛祖從前意
便是羲皇向上人背日一檐渾不暑依山百卉若為春

未逢惠遠相招致厭殺浮生有劫塵

石佛

一段無情作有情如來相貌十分真
不因人世皆塵土誰識山頭不壞身

僧舍偶成

枝頭紅白亂飄零又是風光入柳汀
自笑半生成草草不知雙鬢已星星
貪吟為有詩磨勘戒飲從教酒勒亭
旋學禪牀諸衲子蒙頭相對一函經

晚秋即事

曳筇獨倚柴扉翠發西山漾落暉衲子頂雲隨鴈遠
牧童腰笛挽牛歸

水天一色亭上即事

芰荷深處水壺天時見征帆破晚煙非主非賓和氣裏
似晴似雨綠陰邊憑欄笑語驚魚鳥信步遊行廢管弦
賸喜利名塵不到持竿柳下問漁船

舟次

輕舟小駐綠楊隄，載得閑雲過別溪。
雲本無心天欲暮，一聲何處杜鵑啼。

秋夜

秋滿讀書林，篝燈報夜深。
閒詩有趣為拙仕，無心驚鵲擇枝宿。
幽蟬抱葉吟，未能遊夢境。
何處擣衣砧。

試問

在在江湖蘆葦家，家家楊柳樓臺試。
問燕鴻心事為誰飛，去飛來。

己丑九日次靖節是歲是日韻

采采籬下菊熙熙白首交挈觴酬佳節先驚蒲柳彫日
月不再與名位空相高歸狀龍山青千古擎丹霄彼美
一晉士長揖辭塵勞留錢寄酒家快飲如沃焦尚友前
輩意兀兀而陶陶且了今日歡誰能憂來朝

長相思

追和姜梅
山特立韻

長相思情萬折年少不來春又別寶匳香繡幃月鴻鴈
音信稀鴛鴦魂夢絕尚持百年願料理丁香結

松江

占得中吳第一清
尊鱸里社可鷗盟
七層燈火重湖影
千尺闌干兩市聲
款乃歌分長短律
往來帆帶古今情
三高豈是無名利
祇與時人有重輕

壺中林壑

山下水一泓
山上雲一朵
有塵飛不來
終年風月我

柿葉

柿葉紅如染
橫陳几席閒
小題秋樣句
客思滿江山

林和靖祠

鶴去山孤草亦荒
旋吟長句謁虛堂
束芻尚擬人如玉
一朵梅花當辨香

白牡丹

洛陽分種入侯家
魏紫姚黃謾自誇
素質不為顏色污
看來清得似梅花

生日對梅口占

一生已得半生閑
出入詩篇酒盞閒
祇把小兒看造化

不妨老子號癡頑
幻身且喜無諸恙
靈藥誰能覓大還
多謝梅花來薦壽
年年雪裏破春顏

次王竹齋韻

忘身忘世老方回
適處從教節物催
幾日吟情為菊惱
一天生意趁涼來
屋邊花竹時時好
水外軒窗面面開
獨有此君同此趣
百年事業兩三杯

昭君怨

塞外將軍且罷兵
一身萬里自經營
將軍歌舞升平日

却調琵琶寄怨聲

野雲庵

變態分陰晴悠悠浮太虛冥與此心契時哉道卷舒

鶴隴

一隴以鶴名疑是終南徑山靈無獻嘲出處由來定

雪磴

不記門前路門前一尺深梅花如有語參透老逋心

槃礪

盤旋山水閒隱者固所樂寐寤獨言時畎畝心猶昨

次遊法喜寺韻

招提四百載不與世劫俱松陵拱空覺栢香祠真如時
秋兆嫩涼揖客登其廬廊邃碑篆剝閣迴鐘聲疎中有
白足侶光現摩尼珠勘問點頭石奔走觀心孤坐我六
和室風回晴窗虛棊枰迭勝負譁音發酒餘飽分蔬筍
供似可山林居同是百年客得此一日娛遠社不復見
孰與斯人徒松日簌斜影麾兒呼移廚駕流來鱸鄉野

雲黏菰蒲客散漁火稀冉冉吟蓬孤

次韻

枯坐如僧欠鉢單年來夢不赴槐安稀行種竹容風入
大字鈔書就月看為有故人同冷澹非干明主棄孤寒
因閑悟得家山趣堪笑世閒行路難

香奩體

倚樓目斷暮江邊約定歸期夜不眠香篆有煙燈有暈
笑移針線向牀前

秋感

蘋洲起壯風秋事太怱怱節候一番別心期幾處同牛

沈苔暈碧蟬斷夢枕紅有客愁無奈人生總客中

牛沈
蟬斷

皆田
舍物

泊狀亭

僧舍

舉世正營營閑中意味深無憂伸足夢自樂曲肱吟火
輦香凝穗檐虛樹長陰客來難舉似指水印禪心

菊

壽客若為情風流友麵生殿秋安晚節為隱被香名蔓
衍南陽種淒涼楚澤英見山應自語今古幾淵明

春寒

寒禁蕨芽拳尚小雨緘茶背舌無香山翁不信春光老
祇道儂家未種秧

次范無外孫花翁遊法喜寺韻

兩橋橫處放潮回橋外花邨漲晚埃省事老禪門閉蚤
焚香對月禮如來

江流環合路紆回香火千年地少埃佛法本從方寸起
逢人剛道自西來

簡閑雲

咫尺不相見隔江應見難有孤今雨約轉覺暮雲寒是
處蓮堪社何時芋共餐相思正無賴鵲喜近闌干

舟行

河漢淨如流枯槎便可舟掉頭諸事嬾彈指半生休撼
竹風疑雨依山屋當樓此遊情味好應不待苛留

自釋

繁紅妒紫絢前林杖策來棲花下陰休道遊情難似昔
可能他日尚如今乍晴澗曲縈流水未曉庭皋調野禽
畢竟老天憐老子幽閑斷送一生心

寄越倅

幾欲扁舟載雪來可人風月想蓬萊因思渭北吟春樹
消得江南寄蚤梅應接山川公事省主盟觴詠曠懷開
何當身與浮雲似朝暮飄飄往又回

舟中即事

一岸芡蘆何處邨
小舟蕩漾日黃昏
棲鴉散亂風驚柳
漁火青熒人倚門

次韻

看月過天中
貪幽臭味同
竹光延野碧
燈影染窗紅
聽客譚時務
呼兒誦國風
還思浮世事
到底是惛惛

道院偶成

把茅為屋竹為城
柏子香銷道氣生
九十春光花一片

萬千心事雨三更連邨鼉鼓相高下斷浦漁燈半滅明
閉戶和衣尋小榻夢回猶聽讀書聲

餞友歸侍

閩江閩山相對青照人肝膽寒如冰路旁脩松夾古桂
風鼓吟髭月隨袂君有萊衣我獨無此樂不能與之俱
老夫耄矣君年少喜見功名將遠到歸歟歸歟盍歸歟
長途玉汝千金軀來秋來作廣寒客相攜醉舞紅塵陌

去去

去去扁舟對晚暉晴和直欲減綿衣風來一陣蘆花過
祇道春殘柳絮飛

桃花

漫山高下武陵花一片紅酣散晚霞要識當時秦晉事
隔溪修竹兩三家

次韻

竹滿園林水滿溝幽深地位度春秋坐中不可無侯喜
歌處何須有莫愁別墅簾櫳風颭燕遠邨臺笠雨耕牛

老來應物猶强健多少壯年成夢休

清暉亭

僧舍

半點驚塵不敢留晴光夜色自浮遊一泉走石夜多雨
萬竹圍松風似秋賸喜有詩堪獻佛從教無骨可封侯
上人回施清閑供蘭芷香中著茗甌



宋百家詩存卷二十三